

Vier bekendes kry eregrade

Die Universiteit het in Desember vier eredoktorsgrade verleen - twee daarvan in die Regsgeleerdheid omdat dié fakulteit verlede jaar sy driekwarteeufees gevier het.



Prof. Willie Jonker, prof. Mike de Vries en hoofregter Michael Corbett nadat hulle in Desember verlede jaar eregrade ontvang het. Appèlregter Hennie van Heerden kon nie die plegtigheid bywoon nie en het sy eregraad in absentia ontvang.

Die graad doktor in die Regsgeleerdheid (LL.D.) *honoris causa* is aan hoofregter Michael Corbett en aan appèlregter Hennie van Heerden verleen. Prof. Mike de Vries, gewese Rektor en Visekanselier van die Universiteit, het die graad doktor in die Wysbegeerte (D.Phil.) *honoris causa* ontvang en prof. Willie Jonker, afgetrede hoogleraar aan die Kweekskool, die graad doktor in die Teologie (D.Th.), *honoris causa*.

Hoofregter Corbett is in 1923 in Pretoria gebore. Hy het aan Rondebosch Hoër in Kaapstad en aan die universiteite van Kaapstad en Cambridge gestudeer. In die Tweede Wêreldoorlog het hy in Italië met groot onderskeiding geveg en is op ouderdom 25 (in November 1948) tot die Kaapse Balie toegelaat. Op 40 het hy regter geword en net tien jaar later appèlregter. In 1989 het hy hoofregter geword - 'n pos wat hy tot September 1993 (toe was hy 70 jaar oud) sou beklee het, maar waarvan die termyn tot 31 Desember 1996 verleng is.

Appèlregter van Heerden is 'n Oudmatie wat in 1931 op Edenburg in die Vrystaat gebore is, daar gematrikuleer het, op Stellenbosch die grade B.A. en LL.B. albei met lof geslaag het en in 1959 die graad LL.D. aan die Universiteit van die Vrystaat behaal het. Hy het in 1978 regter geword en in 1982 appèlregter.

Hoofregter Corbett en appèlregter Van Heerden was albei regdeur hul loopbane sterk voorstanders daarvan dat 'n Handves van Menseregte 'n noodsaaklike deel van enige politieke en konstitusionele bestel in Suid-Afrika moet wees.

Prof. De Vries is in 1933 in die distrik Barrydale gebore. Na matriek aan die Hoërskool Barrydale het hy op Stellenbosch die grade B.Sc. (met lof) en M.Sc. verwerf. Later het hy 'n doktorsgraad (in Chemie) aan die Universiteit van Freiburg in Duitsland verwerf.

Sy loopbaan as dosent op Stellenbosch het in Julie 1961 begin en voordat hy in Mei 1979 rektor geword het, was hy professor (op ouderdom 30), dekaan en visirektor. Prof. De Vries het deur sy besondere leiding as rektor oor 'n tydperk van 14 jaar die Universiteit sterk uitgebou en deur verskeie moeilike tye bestuur.

Prof. Jonker is in 1929 in die distrik Lichtenburg gebore, het aan die Universiteit van Pretoria en die Vrije Universiteit van Amsterdam gestudeer, en was etlike jare lank leraar in verskeie gemeentes van die NG Kerk in die huidige Gauteng, asook dosent aan die UP en Unisa, en hoogleraar aan die Teologiese Hogeschool van die Gereformeerde Kerke Nederland in Kampen voordat hy in 1970 professor aan die Kweekskool op Stellenbosch geword het.

Prof. Jonker se vele publikasies het groot invloed op alle vlakke van die samelewing in Suid-Afrika gehad en hy was ook twee dekades lank betrokke by die opleiding van 'n nuwe geslag predikante wat sy invloed oor die hele land uitgedra het. Die huidige ontwikkelinge in die NG Kerk oor eenwording met die Verenigende Gereformeerde Kerk hou nou verband met 'n kerkbegrip waarvoor prof. Jonker reeds meer as 30 jaar gelede met 'n helder profetiese visie 'n sterk pleidooi gepubliseer het. ♦